

DISSERTATIO GRADUALIS  
De  
INVENIENDA  
ELEVATIONE  
POLI,  
OPE  
FILORUM VERTICALIUM.

---

QUAM  
CONS. AMPL. FAC. PHILOS. ABOËNS.  
PRÆSIDE

JOHANNE HENRICO  
LINDQVIST,

MATH. PROF. REG. ET ORD.

*Publice examinandam sifit*

JOSEPHUS HOECKERT,

BOREA - FENNUS.

IN AUDITORIO MAJORI DIE X. NOVEMBRIS  
A. MDCCCLXXXI.

T. A. M. S.

---

ABOÆ,

Impressa apud Viduam Reg. Acad. Typ. J. C. FRENCKELL.

INVENIRE  
ELABORATIONE  
POLI

Terris non omnibus omnia signa  
Conspicimus. Nusquam invenies fulgere Canopum,  
Donec Niliacas per pontum veneris oras.  
Sed querent Helicen, quibus ille supervenit ignis,  
Quod laterum tractus habitant, mediique tumores  
Eripiunt terrae cælum, visusque coercunt.

MANILIUS Astron. L. I. v. 215 --- 220.



## §. I.

Inter præcipuas incrementorum scientiæ fideralis  
remoras, magnum quo exquisitiora instrumenta  
Astronomica venduntur, pretium referendum esse,  
nemini non constat. Tota enim quæ ad situs motus  
que stellarum, debita exactitudine explorandos né-  
cessaria est, supellex tantos requirit sumptus, ut, nisi  
ab opulentissimis, vix parari possit; unde evenit, ut  
paucissimis in locis fieri queant phænomenorum cœ-  
lestium observationes, tam Astronomiæ ipsi & Geo-  
graphiæ perficiendæ, quam variis in communi vita  
usibus inservientes. Hoe incommodum aliquatenus  
sublaturi Astronomi varias excogitarunt methodos,  
adminiculis ubique parabilibus maxime necessarias  
instituendi observationes, quæ licet exactissimæ non  
sint censendæ, nec iis quæ optimo instrumentorum  
apparatu efficiuntur, æquiparandæ, multis tamen in  
casibus utilitatem præstant haud contemnendam. In-  
ter hujusmodi vero adminicula primarium fere lo-  
cum Lineæ verticales & quæ harum ope determi-  
nantur Plana, eo majori jure tenent, quod constet il-  
las constructu esse omnium facillimas. Filum nam-  
que quodvis ex puncto fixo suspensum, pondere in-

ferius appenso, libere pendulum, cessante oscillatione, vi gravitatis situm obtinet horizonti perpendicularem. Quamobrem verticale erit (Eucl. Elem. XI. 18.) planum quodvis per ejusmodi filum transiens, si hujus tanta sit gracilitas, ut instar lineae considerari possit. Immo si major fuerit ejus crassities, dummodo uniformis sit, nec ullas saltim sensibiles habeat inæqualitates, verticalis erit situs plani cuiusque filum istiusmodi secundum longitudinem contingens. Maximum quidem incommodum circa usum ejusmodi filorum videtur esse difficultas nocturnis tenebris ea perspiciendi. Præterquam vero quod nocte serena hiemali imprimis tempore, terra nive obducta, atque in crepusculis, fila ejusmodi utut graciliora ad aliquot pedum distantiam satis distincte appareant, hoc incommodum etjam tolli optime poterit ope candelæ ita occultæ ut per tenuem tantum rimam filum longius ab oculo distans collustret, de cetero autem oculum ipsum nullo lumine directo afficiat. Quod ad agitationes aëris, situm ejusmodi filorum turbantes attinet, concedimus quidem vehementiori tempestate nullas horum ope institui posse observationes, nisi velamine aliquo vel alia quacunque ratione vim aëris a filis avertere liceat. A leviori autem vento ne incurvetur filum, facile præcaveri potest, si maximo, quod sine disruptione ferre valet, oneretur pondere, & hoc aquæ vel alii ciudam fluido ad sistendas ejus vibrationes idoneo immergatur. His adhibitis cautelis, filorum ejusmodi

ope



ope variæ observationes haud inutiles institui possunt. Jam dudum etjam innotuit eorum usus ad construendam lineam meridianam, quæ per observationes stellæ Polaris, filorum verticalium ope tempore opportuno institutas, satis exacte inveniri potest (cfr. DE LA LANDE *Astron.* §. 113--117. Edit. I. MALLET *Mathem. Beskrifn. om Jordklotet* §. 69. aliosque passim). Huc quoque pertinet methodus illa generalis ex transitu duarum stellarum per planum quodvis verticale inveniendi tempus verum, quam tradidit Cel. ELVIUS (*K. Sv. Vet. Acad. Handl.* pro A. 1745. p. 290--292). Ex his occasionem nacti, cum latius extendi posse usum linearum verticalium in Astronomia judicaverimus, benignæ C. L. censuræ jamjam submittimus quasdam meditationes de invenienda Elevatione Poli seu latitudine loci ex institutis ejusmodi filorum ope observationibus stellarum fixarum, quarum vel ex tabulis Astronomicis, vel aliunde cognitæ sint Ascensiones rectæ atque Declinationes.

## §. II.

Ut vero a simplicissimis fiat initium, primo loco ostendemus rationem, qua unius filii verticalis ope latitudo loci investigari possit. Duobus scilicet spectatoribus diversas cœli regiones perlustrantibus, si ab uno observentur binæ stellæ marginem ejusmodi filii simul contingentes, & eodem temporis momento ab altero spectatore in alia quavis cœli plaga (quæ

tamen cum priori in directum non sit posita), binæ aliæ inveniantur stellæ ad limbum fili pariter conspicuæ; ex datis quatuor harum stellarum Ascensionibus rectis atque declinationibus Elevatio Poli pro loco observationis innotescet. Si enim in sphæra cœlesti PZ (Fig. 1.) sit arcus meridiani, P Polus, Z Zenith, A & B stellæ ab uno, C & D ab altero spectatore observatæ; patet Circulos maximos per A, B & per C, D descriptos verticales esse; adeoque utrumque eorum per Z transire. Cum vero per datas stellarum A, B, C, D Ascensiones rectas atque declinationes, positio detur utriusque circuli AB & CD; sequitur eorum etjam intersectionem Z adeoque latitudinem loci dari. Nec inventu difficultis est ratio, qua calculus Trigonometricus ad hanc ipsam latitudinem investigandam institui queat. Descriptis enim Circulis declinationum AP, BP, CP & DP, atque ex alterutro punctorum A, B, ad alterutrum ipsorum C, D ducto arcu Circuli maximi, ex. gr. BC, cum dentur anguli APB, BPC, CPD, quippe qui sunt Ascensionum rectarum differentiæ, & ex stellarum declinationibus præterea innotescant arcus AP, BP, CP & DP (Declinatio enim cuiusvis stellæ est complementum distantiae ejus a Polo); resolvendo Triangula Sphærica APB, BPC & CPD, in quibus singulis duo dantur latera cum angulo ab his intercepto, inveniri possunt arcus BC atque anguli ZBP, PBC, PCB & PCZ, adeoque etjam ZBC & ZCB. Porro in  $\Delta$  ZBC ex inventis his angulis ZBC &

ZCB

ZCB atque latere interjecto BC, investigari potest alterutrum reliquorum laterum, ut BZ, ex quo una cum latere BP atque ang. PBZ in  $\triangle$  ZPB invenietur tandem latus PZ, quod complementum est ipsius Latitudinis.

Quum vero nimis prolixus foret calculus hac ratione institutus, alia & brevior via ad Latitudinem loci ex istis datis inveniendam sequenti ratiocinio detegi potest. Demissio ex P in ZB perpendiculo PM, cum (Trigon. Sphær.) sit  $Cof MPA : Cof MPB :: Cotg PA : Cotg PB$ , erit (Compon. & div.)  $Cof MPA + Cof MPB : Cof MPA - Cof MPB :: Cotg PA + Cotg PB : Cotg PA - Cotg PB$ . Est autem (<sup>\*</sup>Lem. i.)  $Cof MPA + Cof MPB : Cof MPA - Cof MPB :: Cotg \frac{1}{2}(MPB + MPA) : Tg \frac{1}{2}(MPB - MPA) :: Cotg(MPA + \frac{1}{2}APB) : tg \frac{1}{2}APB$ , & (<sup>\*</sup>Lem. 3.)  $Cotg PA + Cotg PB : Cotg PA - Cotg PB :: Sin(PB + PA) : Sin(PB - PA)$ . Ergo  $Cotg(MPA + \frac{1}{2}APB) : tg \frac{1}{2}APB :: Sin(PB + PA) : Sin(PB - PA)$ ; unde ex datis AP, BP & ang. APB innotescit MPA: quumque (Trig. Sphær.) sit  $Tg MP : Cof MPA :: Tg AP : R$  (Radium sive Sinum Totum), invenitur etiam MP. Pasi modo si agatur PN perpendicularis ipsi ZD, erit  $Cotg(NPC + \frac{1}{2}CPD) : tg \frac{1}{2}CPD :: Sin(DP + CP) : Sin(DP - CP) & Tg PN : Cof NPC :: Tg PC : R$ , unde inveniuntur NPC & NP. Cognitis vero ang. MPA, APC & NPC, innotescit etiam MPN. Porro quoniam  $Cof MPZ : Tg MP (\because R : tg PZ) :: Cof NPZ : tg PN$ , erit (altern. comp. & div.)

$Cof MPZ \leftrightarrow Cof NPZ : Cof MPZ - Cof NPZ ::$   
 $tg PM \leftrightarrow tg PN : tg PM - tg PN$ , adeoque (\*Lem.  
 1. 2.)  $Cotg \frac{1}{2}(NPZ \leftrightarrow MPZ) : Tg \frac{1}{2}(NPZ - MPZ)$   
 $:: Sin(PM \leftrightarrow PN) : Sin(PM - PN)$ , unde constat  
 $MPZ$ , cuius valorem substituendo in superiori Analogia  $Cof MPZ : tg PM :: R : tg PZ$ , invenitur  $PZ$   
 seu complementum Latitudinis Loci. Q. E. I.

\*LEMMA 1.  $Cof a \leftrightarrow Cof b : Cof a - Cof b ::$   
 $\text{Cotang } \frac{1}{2}(b \leftrightarrow a) : \text{Tang } \frac{1}{2}(b - a)$ .

LEMMA 2.  $Tang c \leftrightarrow Tang d : Tang c - Tang d ::$   
 $\text{Sin}(c \leftrightarrow d) : \text{Sin}(c - d)$ .

LEMMA 3.  $Cotang d \leftrightarrow Cotang c : Cotang d - Co-$   
 $tang c :: \text{Sin}(c \leftrightarrow d) : \text{Sin}(c - d)$ .

Demonstr. Sit (Fig. 2.) ADB Quadrans circuli centro C descripti, adeoque ang. ACB rectus, & sint AF, AD, AE tres arcus æquidifferentes. Per D ducatur recta LK circulum contingens, radiis CA, CF, CE & CB productis occurrentes in L, G, H, K. Per E & F agatur recta PQ, radiis CA, CD, CB occurrentes in P, O, Q respective. Unde ob  $ED = DF$ , erit  $EO = OF$  & ang. EOC rectus, adeoque  $=$  ang. KDC, quamobrem parallelæ erunt PQ & LK. Ducantur denique per E, O, F ipsi BC parallelæ rectæ ER, OM & FN. Hac facta constructio-  
 ne, si

i:o Sit  $AF = a$  &  $AE = b$ , erit  $DF$  vel  $DE =$   
 $\frac{1}{2}(b - a)$  &  $AD = \frac{1}{2}(b \leftrightarrow a)$  adeoque  $DK = \text{Tang } BD$

==

$\Rightarrow \text{Cotg } AD = \text{Cotg } \frac{1}{2}(b+a) \text{ & DH vel DG} = \text{tang } \frac{1}{2}(b-a)$ . Quumque ob parallelas ER, OM, FN, & ob EO = OF, sit RM = MN; erit CN = CR seu  $\text{Cos } a - \text{Cos } b = 2MN$  &  $\text{Cos } a + \text{Cos } b = 2CM$ , quare  $\text{Cos } a + \text{Cos } b : \text{Cos } a - \text{Cos } b :: CM : MN$ . Jam vero ob parallelas CQ, OM, & FN, est  $CM : MN :: QO : OF$ , & ob parallelas QP & KL, est  $QO : OF :: KD : DG$ . Ergo erit  $CM : MN :: KD : DG$  seu  $\text{Cos } a + \text{Cos } b : \text{Cos } a - \text{Cos } b :: \text{Cotang } \frac{1}{2}(b+a) : \text{tang } \frac{1}{2}(b-a)$ . Q. E. 1:0 D.

2:0 Sit  $AD = c$  &  $DE$  vel  $DF = d$ , erit  $HL = \text{tg } c + \text{tg } d$ ,  $GL = \text{tg } c - \text{tg } d$ ,  $EA = c + d$  &  $FA = c - d$ , adeoque  $ER = \text{Sin } (c+d)$  atque  $FN = \text{Sin } (c-d)$ . Quum vero ob parallelas KL, QP, sit  $HL : GL :: EP : FP$ , atque ob parallelas ER & FN, sit  $EP : FP :: ER : FN$ ; erit  $HL : GL :: ER : FN$ , seu  $\text{tg } c + \text{tg } d : \text{tg } c - \text{tg } d :: \text{Sin } (c+d) : \text{Sin } (c-d)$ . Q. E. 2:0 D.

3:0 Quum sint Cotangentes in ratione inversa tangentium (Elem. Trig.) erit  $\text{Cotg } d : \text{Cotg } c :: \text{tg } c : \text{tg } d$ , adeoque (compon. & divid.)  $\text{Cotg } d + \text{Cotg } c :: \text{Cotg } d - \text{Cotg } c :: \text{tg } c + \text{tg } d : \text{tg } c - \text{tg } d :: (\text{Lem. 2.}) \text{ Sin } (c+d) : \text{Sin } (c-d)$ . Q. E. 3:0 D.

### §. III.

Quum non semper talis inveniri queat quatuor stellarum nudis oculis conspicuarum positio, qualis in §. præced. requiritur, dispiciendum est, qua ratio-

ne

ne ex observationibus eārum diversis temporibus factis, investiganda sit Elevatio Poli. Hujusmodi vero obſervationes adhibitis tribus vel quatuor filis verticalibus institui possunt ope horologii qualisunque cuius sit motus æquabilis. Filis namque ita constitutis, ut planum bina eorum contingens cum plano bina alia contingente, angulum quemcunque efficiat, quorum planorum ſectiones in ſphæra cœleſti ſint circuli verticaleſ ZB & ZD (Fig. 1.), in uno horum planorum BZ duarum ſtellarum A, B, & in altero ZD pariter duarum C, D tranſitus obſerventur, ſimulque in horologio intervallo temporum inter ſingulaſ has quatuor obſervationes notentur. Examinandus vero præterea eſt motus horologii, ut innotescat, quantus cuivis horum temporum competat angulus horarius ſeu arcus æquatoris, quod (obſervationibus in ſtellas fixas institutis) non meridiani tantum, ſed & cujuſvis plani ope fieri potest. Si nimirum fuerit T Tempus horologio obſervatum, ex tranſitu ſtelle per planum aliquod, donec integra facta revolutione ad idem planum redierit, præterlapsum; invenietur pro dato quovis tempore, ejusdem horologii ope mensurato, angulus horarius, inferendo: ut eſt T ad datum tempus, ita quatuor anguli recti ſeu  $360^\circ$  ad angulum quæſitum. Cognitiſ hac ratione tribus iſtis angulis, qui obſervatis inter tranſitus ſtellarum A, B, C, D, temporum intervallis reſpondent, facile inveniuntur anguli APB, BPC & CPD. Si namque FAG fit portio circuli paralleli a ſtel-

9

a stella A descripti, atque FPB (vel GPB) differentia inter rectas ipsarum A & B ascensiones; momento appulsus stellæ B ad verticale BZ, erit locus ipsius A in F (vel G), adeoque FPA (vel GPA) ang. horarius pro intervallo temporis inter observatos harum stellarum transitus. Unde patet inveniri angulum APB datæ ascensionum rectarum differentiæ FPB (vel GPB) addendo (vel subtrahendo) inventum angulum horarium FPA (vel GPA). Eodem modo investigantur anguli BPC & CPD. Nec difficile erit dijudicatu, utrum additio vel subtractio locum habeat pro quovis horum, ex datis angulo horario & ascensionum rectarum differentia, inveniendo, cum cognita sit ipsarum stellarum positio, & ex observationibus constet, quo ordine per plana ista verticalia transierint. Inventis vero ang. APB, BPC & CPD, datisque præterea harum stellarum a Polo distantiis AP, BP, CP & DP, eadem qua prius (§. 2.) ratione colligitur quæsita loci latitudo.

#### §. IV.

Si observationes ita institutæ (§. 2. 3.) omni numero exactæ essent, posito situ verticalium BZ, DZ vel angulo BZD (Fig. 1.) qualicunque, perfectly vera foret quæ ex illis eruitur Elevatio Poli. Quum autem minores observationum errores vix evitari queant, talis eligenda est horum verticalium positio, ut hinc inventa latitudo a vera minimum ab  
B erret.

erret. Monendum itaque est, ceteris paribus ex hujusmodi observationibus exactissime inveniri Elevationem poli, si plana ista verticalia BZ, DZ perpendiculariter sibi invicem insistant, & quidem alterum eorum, ut ZD, plano meridiani, alterum BZ primo verticali congruat, atque stellæ in primis A & B per hoc transeuntes, tales eligantur, ut quantum possit, minima fiat ratio:  $\sin AZ : \sin BZ : R.$   $\sin AB$ , quod quidem posteriori saltem methodo (§. 3.) adhibita, optime succedit, unam illarum versus orientem, alteram versus occidentem, utramque vero circa  $45^\circ$  altitudinem observando. Quumque ut jam (§. 1.) innuimus, constet methodus planum meridiani etiam duorum filorum verticalium ope inveniendi, nec difficilis determinatu sit positio tertii fili talis, ut cum alterutro priorum planum constituat meridiano perpendicularare, adeoque cum primo verticali coincidens; hæc plana præ ceteris eligenda sunt ad observationes hujusmodi instituendas, idque eo magis quod horum ope duæ etiam stellæ observatæ sufficiant ad latitudinem loci determinandam. Si enim sit (Fig. 3.) EZP meridianus, in quo stella C (vel D), & ZAB primus verticalis, in quo stella A eodem tempore observatur; invenietur ang. ZPA, quippe qui æqualis est differentiæ inter harum stellarum asc. rectas (si observata sit stella C culminans), vel hujus differentiæ supplemento ad  $180^\circ$  (si in inferiori suo per meridianum transitu observata fuerit stella D). Si vero diversis temporibus institutæ sint observatio-  
nes

nes stellarum C (vel D) & A, ad inveniendum ang. ZPA (cfr. §. 3.) differentiae asc. rectarum addendus est vel subtrahendus angulus horarius intervallo temporis respondens. In triangulo igitur sphærico ZAP, rectangulo ad Z, ex datis ang. ZPA & latere PA (videlicet ipsius A distantia a Polo), inferendo:  $R : \cos ZPA :: \tg PA : \tg PZ$ , invenitur latitudo loci  $\equiv 90^\circ - PZ$ , & quidem eo exactius quo major fuit stellæ A altitudo supra horizontem, & quo minor ipsius C (vel D) declinatio.

Potest quoque inveniri Elevatio poli, in solo verticali primo BZ observando binas stellas A & B, sive simul, sive interjecto aliquo tempore horologii ope mensurando. Innotescit enim ut supra ang. APB, unde & ex cognitis AP, BP, latitudinis quæsitæ complementum PZ obtinetur eadem ratione, qua ex iisdem datis inveniri posse normalem PM in §. 2. docuimus. Et hoc quidem modo latitudo loci eo exactior eruitur, quo minor fit ratio:  $\sin AZ : \sin BZ : R : \sin AP$ .

Facile patet eadem methodo latitudinem quæsitam etiam colligi posse ex institutis binarum stellarum A, B (Fig. I.) observationibus in quocunque verticali BZ, cuius cognita sit ad meridianum inclinatio BZP. Invento enim ut antea (§. 2.)  $MA$ , quum in  $\triangle PMZ$  ad M rectangulo præterea detur ang.  $PZM$ , inferendo:  $\sin PZM : \sin PM :: R : \sin PZ$  obtinetur  $PZ$  adeoque ipsa latitudo.

Error vero, qui in determinanda positione plani  $BZ$  committi facile potest, inventam latitudinem eo magis afficit, quo major sit istius plani declinatio a verticali primo. Hujus igitur verticalis usum præ ceteris eligere præstat, quoniam & inventu facilis est ejus positio, & si in ea construenda aliquantulum erretur, nulla tamen inventæ latitudinis a vera inde oritur differentia. Sit enim Circulus  $ZK$  (Fig. 3.) primus verticalis, & stellæ  $A, B$  observatae in verticali  $ZB$ , cujus exigua sit ab illo declinatio  $BZK$ ; sint præterea  $AA'$ ,  $BB'$  portiones parallelorum a stellis  $A, B$  descriptorum, atque primo verticali in  $A, B'$  occurrentium, & per hæc puncta polo  $Z$  fiant arcus  $A'a$ ,  $B'b$ , atque per  $A, A', B, B'$  describantur circuli declinationum, æquatori  $EQ$  occurrentes in  $F, f, G, g$ , respective. His factis quum exiguus sit ang.  $BZK$ , erit  $A'a : B'b :: \sin A'Z : \sin B'Z$ . Porro quoniam recti adeoque æquales sunt ang.  $ZA'a$  &  $AA'P$ , communi  $AA'Z$  sublato, erit ang.  $AA'a = ZA'P$ , adeoque  $AA' : A'a (\because R : \cos ZA'P \text{ & ob ang. } A'ZP \text{ rectum}) :: Tg A'P : Tg A'Z$ . Pari ratione est ang.  $BB'b = ZB'P$  &  $B'b : BB' (\because \cos ZB'P : R) :: Tg B'Z : Tg B'P$ . Præterea est  $Ff : AA' :: R : \sin A'P$ , &  $BB' : Gg :: \sin B'P : R$ . His vero quinque analogiis compositis, obtinetur  $Ff : Gg :: \cos A'Z : \cos B'P : \cos B'Z : \cos A'P$ . Quum autem sit  $\cos A'Z : \cos A'P (\because R : \cos PZ) :: \cos B'Z : \cos B'P$ ; erit  $\cos A'Z : \cos B'P = \cos B'Z : \cos A'P$  & hinc  $Ff = Gg$ . Addito igitur communi  $fG$  erit  $FG = fg$ ; ad-  
eoque

eoque ang.  $APB = A'PB'$ . Unde quum etjam sit  $AP = AP$  &  $B'P = BP$ , patet nullum ideo fore errorem latitudinis, quod loco primi verticalis  $ZK$  adhibetur  $BZ$  aliquantulum ab illo declinans.

## §. V.

Inveniri etjam potest latitudo loci, binas tantum stellas  $H$ ,  $F$  (Fig. 3.) observando in eodem plano verticali, quamvis hujus non constet declinatio, si altera earum  $H$  in ipso horizonte adeoque vel oriens vel occidens appareat, & praeter asc. rectas atque declinationes harum stellarum, cognita quoque sit refractio horizontalis, quæ dicatur  $r$ . Ex differentia enim asc. rectarum & (si ipsarum  $H, I$  ad planum  $ZH$  appulsus simultaneus non fuerit) ex intervallo temporis inter observationes, colligitur (ut antea) ang.  $IPH$ , unde & ex datis  $PH$  atque  $PI$  in  $\Delta PIH$  innotescit ang.  $PHI$ . Cognitis igitur in  $\Delta PZH$ , ang.  $PHZ$  & lateribus  $PH$  atque  $ZH$  ( $= 90^\circ + r$ ), inventur  $PZ$ . Latitudinem autem hac ratione inventam, praeter errores ipsarum observationum, etjam refractionis horizontalis variatio incertam reddit. Hic vero error evitari potest, si in plano primi verticalis vel huic proximo observationes istae instituantur. Nec opus est ut ope meridiani (§. 4.) construatur primum istud verticale. Observando enim orientem vel occidentem stellam aliquam  $R$ , cuius sit aut nulla aut saltim exigua declinatio  $QR$ , (qualis v. gr. est stella




Fig. 4.

Fig. 2.





Fig. 5.



)

14



in cingulo Orionis occidentalior, a Bayero & dicta,  
cujus hoc tempore est decl. Australis =  $28' 33'', 6$ ) &  
in eodem verticali ZR observando præterea aliam  
quandam stellam A, invenietur Elevatio Poli, etjamsi  
incognita sit ipsa refractio. Descriptis enim stellarum  
R, A parallelis primo verticali ZK occurribus in  
K, A', eadem qua in §. præced. ratione demonstra-  
tur fore ang. A'PK = APR, qui ex observationibus  
innoteſcit. Præter ang. itaque rectum PZK dantur  
ang. A'PK & latera PA' (= PA) & PK (= PR),  
unde ut antea invenitur PZ, & quidem eo exactius  
quo major fuerit stellæ A altitudo supra horizontem.

## §. VI.

Ex iis quæ jam de usu filorum verticalium in  
invenienda Elevatione Poli differuimus, haud difficile  
foret plures adhuc deducere methodos, eandem hu-  
jusmodi filorum ope investigandi. Sufficiat vero præ-  
cipuas earum attulisse, quibus, observations ipsas  
pluries repetendo & ex collectis ipsius latitudinis  
valoribus medium sumendo, exacte satis illam  
inveniri posse autumamus.

